

आकाशवाणी

खबरां

1. सुप्रीम कोर्ट नै अरावली पहाड़िं ते पर्वत श्रृंखला दी परिभाषा पर जारी अपने गै आदेश पर रोक लाई दिती ऐ।
2. सर्वोच्च अदालतै दिल्ली हाई कोर्ट दे उस आदेश पर रोक लाई दिती ऐ जेदे च उन्नाव दुष्कर्म मामले च दिती गेदी सेंगर दी आजीवन कारावास दी सजा निलंबित करी दिती ही।
3. उपराष्ट्रपति सी.पी राधाकृष्णन होरें युवाएं गी आग्रह कीता ऐ जे ओहू डिजिटल उपकरण, उत्पादकता ते संपर्क गी बढ़ाई सकदे न, पर उनेंगी मुल्लें कदरें कन्नै निगरानी पर बी ध्यान देना लोड़चदा।
4. केंद्री मंत्री शिवराज सिंह चौहान होरें आखेआ जे सरकार नै विकसित भारत जी राम जी कनून मनरेगा दी कमिं खांमिं गी दूर करने लेई आंदा ऐ।
5. उत्तर भारत दे केई हिस्सें च घनी धुंध करी हवाई ते रेल सेवा पर माड़ा असर पेआ। दिल्ली हवाई अड्डे दे प्रबंधन मुजब धुंध करी 64 डोआरियां रद्द कीतियां गेइयां।
6. फिडे विश्व रैपिड प्रतियोगिता च अर्जुन एरिगैसी ते कोनेरू हम्पी नै कैंS दा तगमा जित्तेआ ऐ।

<><><><><><>

SC-Aravali Hills

सर्वोच्च न्यायालय अरावली पहाड़ियें ते अरावली पर्वत श्रृंखला दी परिभाषा पर 20 नवंबर गी जारी अपने आदेश पर रोक लाई दिती ऐ। मुख्वा न्यायाधीश न्यायमूर्ति सूर्यकांत ते न्यायमूर्ति जे.के. माहेश्वरी ते ए.जी. मसीह हुन्दी छुट्टिं आहली पीठ नै अरावली दी परिभाषा दे सरबंध्य च जांच कीते जाने आहले मुद्दे दे परीक्षण आस्तै इक नमी माहिराना समिति गठित करने दा बी आदेश दिता ऐ। सर्वोच्च अदालतै आखेआ ऐ जे पैहले सोयां मंजूर परिभाषाएं पर स्पष्टीकरण जरूरी ऐ ते 20 नवंबर गी जारी शीर्ष न्यायालय दे निर्देशें पर फिलहाल रोक रहौगा। अदालतै इस मुद्दे पर केंद्र ते राजस्थान, गुजरात, दिल्ली ते हरियाणा गी नोटिस जारी करिए जवाब मंगेआ ऐ। अदालतै अरावली पर्वत श्रृंखला दी परिभाषा कन्नै जुडी दी चिंताएं पर आपू संज्ञान लैता हा। केंद्रीय पर्यावरण, वन ते जलवायु परिवर्तन मंत्रालय नै 24 दिसंबर गी राज्यें गी अरावली च कुसै बी नमे खनन लीज देने पर पूरी चाल्ली रोक लाने दे निर्देश जारी कीते हे। पर्यावरण, जंगलात ते जलवायु बदलाव सरबंध्य परिवर्तन मंत्री भूपेंद्र यादव होरें अरावली पर्वतमाला कन्नै संबंधित अपने गै आदेश पर रोक लाने दे सर्वोच्च अदालतै दे फैसले ते मुद्दे दा अध्ययन करने आस्तै कायम नमी समिति दा सोआगत कीता ऐ। सोशल मीडिया पोस्ट च यादव होरें आखेआ जे सरकार अरावली पर्वतमाला दे संरक्षण ते उसदी परतिए नमे सरिरेआ सोआरने आस्तै उनदे मंत्रालय थवा मंगी गेदी हर संभव सहायता प्रदान करने आस्तै बचनबद्ध ऐ। उने आखेआ जे फिलहाल नमें खनन पट्टें दे कन्नै मौजूदा पट्टें दे नवीनीकरण पर बी पूरी चाली पाबंदी लागू ऐ।

<><><><><><>

SC-Senger

सर्वोच्च अदालतै अज्ज दिल्ली उच्च न्यायालय दे उस आदेश पर रोक लाई दिती जेदे च भाजपा थवा निष्कासित नेता कुलदीप सिंह सेंगर गी 2017 दे उन्नाव बलात्कार मामले च दिती गेदी आजीवन कारावास दी सजा निलंबित करी दिती गेई ही। उच्च न्यायालय नै एहू यकीनी कीता जे ओहू जेल च गै रहौगा। न्यायमूर्ति सूर्यकांत, न्यायमूर्ति जेके माहेश्वरी ते न्यायमूर्ति ऑगस्टीन जॉर्ज मसीह हुन्दी अध्यक्षता आहली पीठ नै श्री सेंगर गी नोटिस जारी करिए सीबीआई दी उस याचिका पर जवाब मंगेआ ऐ, जिसदे च उच्च न्यायालय दे आदेश गी चुनौती दिती गेई ऐ। सीबीआई दी तरफा पेश होए दे सॉलिसिटर जनरल तुषार मेहता होरें पीठ सोयां उच्च न्यायालय दे आदेश पर रोक लाने दा आग्रह कीता। पीठ नै आखेआ जे ओहू इस मामले दी जांच करोग कि जे एहू मामला विचार

करने योग्य ऐ। पीठ नै आखेआ जे सेंगर गी हिरासत सोयां रिहा नेई कीता जाग। इस मामले च कानून दे महत्वपूर्ण सोआल विचार करने जोग न ते मामले दी सुनवाई चार हफते मगरा आस्तै स्थगित करी दिता। इसदे थवा पैहले, उच्च अदालतै उन्नाव बलात्कार मामले च आजीवन कारावास दी सजा कट्टा'रदे सेंगर दी सजा गी निलंबित करी दिता हा, एह आखेदे होई जे ओहू पैहले गै 7 बरे ते 5 महीने जेल च गुजारी चुके दा ऐ। हालांकि सेंगर जेल च गै रौहग कि जे एह पीड़ित दे पिता दी हिरासत च होई मौत दे मामले च बी 10 साल दी सजा कट्टा'रदे ऐ।

<><><><><><>

Prez. Santhali

राश्ट्रपति द्रौपदी मुर्मू होर अज्ज झारखंड दे पूर्वी सिंह भम जिले च जमशेदपुर दे करंडीह क्षेत्र च संथाली भाशा दी ओल चिकी लिपि दे शताब्दी समारोह दे समापन कार्यक्रम च शामिल होइयां। इस दरान उने ओल चिकी लिपि दे जनक पंडित रघुनाथ मुर्मू पंडित रघुनाथ मुर्मू होरें गी श्रद्धांजलि बी भेंट कीती। 22में पारसी महा संथाली सम्मेलन च अपनी मातृभाशा च बोलदे होई राश्ट्रपति होरें संविधान गी संथाली भाशा च करने लेई कीते जा'रदे जत्रें दी सराहना कीती।

<><><><><><>

PM-ICMR

प्रधानमंत्री नरेंद्र मोदी होरें अपने मन की बात कार्यक्रम च रोगाणुरोधी प्रतिरोध दा मुद्दा पुट्टेआ। भारती चिकित्सा अनुसंधान परिषद दे महानिदेशक डॉ. राजीव बहल होरें आखेआ जे एंटीबायोटिक्स दा इस्तेमाल छड़ज लोड़ पौने पर ते डॉ. दी सला जारी गै कीता जाना चाइदा। अज्ज नमीं दिल्ली च मीडिया कन्नै गल्ल करदे होई बहल होरें आखेआ जे निमोनिया जनेहू संक्रमणें आस्तै एंटीबायोटिक्स दा ज्यादा इस्तेमाल कन्नै असर घट्ट होई गेआ ऐ।

<><><><><><>

VP-AI

उप राश्ट्रपति सी.पी राधाकृष्णन होरें आखेआ ऐ जे ए.आई स्वचालन जैव प्रौद्योगिकी ते डिजिटल संपर्क जीवन दे हर पैहलू गी नमा आकार देआ'रदी ऐ। उनें आखेआ जे लोकें गी प्रौद्योगिकी प्रति उत्साह ते नैतिक सतर्कता दौनें कन्नै अगगे बदना लोड़चदा। उप राश्ट्रपति होरें युवाएं गी आग्रह कीता जे ओहू डिजिटल उपकरण, उत्पादकता ते संपर्क गी बदाई सकदे न पर उनेंगी बड़ा मता चिंतन ते समाज कन्नै सार्थक जुड़ाव दी क्षमता घट्ट करने दी इजाजत नेई दिती जानी लोड़चदी।

<><><><><><>

Viksit-Bharat

राई-बाई, करसान कल्याण ते ग्रामीण विकास मंत्री शिवराज सिंह चौहान होरें आखेआ जे केंद्र सरकार नै मनरेगा योजना च मौजूद बक्ख-बक्ख कर्मिं ते बे-जाबतगिएं गी दूर करने आस्तै इक नमा कनून विकसित भारत जी राम जी पेश कीता ऐ। उत्तराखंड दे गौचर च राज्य स्तरीय करसान दिवस 2025 कार्यक्रम गी संबोधित करदे होई चौहान होरें आखेआ जे मनरेगा तैहत पैहले 100 दिनें दा रोजगार दिता जंदा ऐ पर नमें कनून तैहत इसी बदाइए 125 दिन करी दिता गेआ ऐ। कृषि मंत्री होरें आखेआ जे उत्तराखंड च बागवानी, पशुपालन ते मत्स्य पालन क्षेत्रें दा विस्तार कीता जाह्ग। उनें आखेआ जे करसानें दी आमदन बदाने आस्तै राज्यें च उत्पादित फलें, सब्जिएं ते औषधीय जड़ी बूटिएं गी राश्ट्री ते अंतरराश्ट्री बजारें कन्नै जोड़ेआ जाह्ग।

<><><><><><>

G Ram G Act

विकसित भारत रोजगार ते आजीविका मिशन गरंटी (ग्रामीण) विकसित भारत जी राम जी अधिनियम तैहत ज्यादातर राज्यें गी पिछले 7एं बरें दे मकाबले च 17 ज्हार करोड़ रपे मते थोने दी मेद ऐ। इन्नै 20 बरें पराने

महात्मा गांधी राष्ट्रीय ग्रामीण रोजगार गारंटी अधिनियम 2005 दी थाह लैती ऐ। भारती स्टेट बैंक दे इक्क शोध मुजब अधिनियम राएं राज्ये गी पैसे दी बंड आहले सरिस्ते च सुधार होगा। रिपोर्ट च इब्बी आखेआ गोआ ऐ जे विकसित भारत जी राम जी अधिनियम दा मकसद बदलाव आहली नीतिएं, तौर-तरीकें गी किट्टे करना ऐ। एहदे राएं परियोजना दी पंछान उत्पादक, संपत्ति निर्माण, मती आमदन पैदा करना ते इक्क कारगर निगरान सरिस्ते कन्नै सरबन्धी चुनौतिएं दा हल करने पर ध्यान केंद्रित कीता जाहगा। बैंक दे मुख् आर्थिक सलाहकार डॉ. सोम्य कांति घोश हुंदी इस रिपोर्ट च आखेआ ऐ जे विकसित भारत जी राम जी कनून दा मकसद सभनें सतहें पर रोजगार पैदा करना, पारदर्शिता बधाना ते जवाबदेह गी मजबूत करदे होई पूरे-पराते सरिस्ते च कमजोरियें गी दूर करना ऐ। संसद दे हाल दे सीतकालीन सत्र च विकसित भारत जी राम जी विधेयक 2025 पारित कीता गोआ। राष्ट्रपति द्रोपदी मुर्मू होरें इस विधेयक गी अपनी मंजूरी दिती। एह कनून हर ग्रामीण परिवार गी 125 दिनें दी मजदूरी रोजगार दी गारंटी दिंदा ऐ।

<><><><><><>

### Australian Tariff

उद्योग ते बपार मंत्री पीयूष गोयल होरें आखेआ ऐ जे अगले बरे पैहली जनवरी थमां आस्ट्रेलिया गी भारती निर्यात पर कोई शुल्क नेई लगगोग। उनें आखेआ जे एहदे कन्नैश्रम प्रधान क्षेत्रें आस्तै नमें मौके खुल्लंगन। भारत आस्ट्रेलिया आर्थिक सहयोग ते बपार समझौते दी त्री बरे गंड पर गोयल होरें आखेआ जे पिछले त्रै बरे च इस समझौते कन्नै निर्यात च लगातार बाद्दा, बजार तगर पुज्ज ते आपूर्ति श्रृंखला च मजबूती आई ऐ। गोयल होरें दस्सेआ जे इस समझौते कन्नै भारती निर्यातकें, लौहके, भलेआं लौहके करसानें ते मजदूरें गी लाह होआ'रदा ऐ।

<><><><><><>

### 2025 The Year of Reform

ब'रा 2025 भारत दी विकास यात्रा च महत्वपूर्ण ध्याऽ रेआ ऐ। इस ब'रे केई नीतियें गी हकीकी रूप दिता गोआ ऐ। अज्ज अपनी बशेष श्रृंखला सुधारें दे ब'रें च अस तुंदे आस्तै लेइयै आए आं जे किस चाल्ली भारत गी तेजिया कन्नै अगडे बदने आहले मुख् दे रूपै च चेत्ता कीता जाहगा। प्रधानमंत्री नरेंद्र मोदी हुंदी अगुवाई च ओहू उस्सलै इक महत्वपूर्ण पल बनी गोआ जिस्सलै भारत नै पराने कनूनें गी छोड़ियै अपने टैक्स ते नियमक ढांचे गी सखल्ला बनाया। इन्ना गै नेई उद्योगें आस्तै नमें बूहे खोले ते शासन गी आत्मविश्वास आहले मुख् दी आसें-मेदें कन्नै जोडेआ ऐ। एह इक नेहा बरा रेहा ऐ जिसलै भारत दा आर्थिक रौंह, वैश्विक महत्वकांक्षा बक्खी लगातार बदाया गोआ। एहदा असर ग्रामीण भारत उद्योग, श्रम बजारें ते भविक्ख गी आकार देने आहले उभरदे खेत्तरें च दिक्खने गी लब्बा। प्रधानमंत्री हुंदे आसेआ 15 अगस्त गी नियामक सुधारें ते 21मीं सदी दे भारत लेई कनूनें गी परतियै त्यार करने दी लोड दा आह्वान इनें सुधारें च झलकदा ऐ।

<><><><><><>

### New Year Enforcement

नमें ब'रे पर दिल्ली यातायात पुलस नै राष्ट्रीय राजधानी च शिडक सुरक्षा यकीनी करने ते शराब पीए गड्डी चलाने करी होने आहले हादसें गी रोकने आस्तै प्रवर्तन उपाएं गी तेज करी दिता ऐ। वरिष्ठ अधिकारी आपूं प्रतर्तन गतिविधिएं दी निगरानी करा रदे न ते संवेदनशील थाहरें पर बाद्दू बल तैनात कीते गए न। तेज गति करी 14 जहार थमां मते ते लाल बत्ती गी पार करने आस्तै 5 जहार थमां मते ई चलान जारी कीते गए न।

<><><><><><>

### New Year Arrangements

नमें ब'रे आहले जश्र कोला पैहले जम्मू खित्ते दिएं बक्ख-बक्ख थाहें खास करियै पत्नीटांप ते सनासर ज्नेही बड्डी सैलानी थाहें पर सुरक्षा बंदोबस्त तगडे करी दिते गए न। पुलस अधिकारियें दा आखना ऐ जे सार्वजनिक सुरक्षा यकीनी बनाने ते कनून बवस्था आहली स्थिति बरकरार रखने दे मकसद कन्नै विशेष सुरक्षा दस्ते कायम कीते गए

ना। सैलानिएं दी आओजाई दे प्रबंधन ते कुसै बी माड़ी घटना गी रोकने दे मकसद कन्नै सुरक्षाबलें दे जवानें दी बाद्दू तैनाती दे कन्नोकन्नी जांच चौकियां स्थापित कीतियां गेइयां न ते गश्त गी होर बधाई दिता गेआ ऐ। मकामी लोकें ते सैलानिएं लेई नमें बरै दे जश्र गी रमानदारी आह्ला, बवस्थित ते सुरक्षित बनाने लेई ट्रैफिक नियमन, भीड़ प्रबंधन ते सख्त निगरानी आह्ले हीलें गी अमल च आह्नेआ गेआ ऐ।

<><><><><><>

## Dense Fog

उत्तर भारत दे केई हिस्सें च घनी धुंध करी ब्हाई ते रेल सेवा पर माड़ा असर पवा'रदा ऐ। ऐलवे दे दिल्ली डिविजन मुजब दिल्ली जाने आह्लियां तकरीबन 18 ट्रेनां 3 घेंटे शा मता चिरे चला'रदिआं ना। माड़े मौसम दा असर ब्हाई जात्तराएं पर बी पवा'रदा ऐ। दिल्ली ब्हाई अड्डे दे प्रबंधन मुजब घनी धुंध करी अज्ज 64 डुआरियां रद्द करी दिती गेदियां ना। तोआई, सिविल हवाबाजी सरबंधी मंत्रालय नै जात्रिएं लेई सलाह जारी करदे होई एह गुजारश कीती ऐ जे ओहू एयरलाइन कंपनिएं दे अधिकारिक संचार चैनलें राहें ताजा जानकारियां हासल करदे रौह्ना। एयर इंडिया इंडिगो ते स्पाइसजेट ज्नेही ब्हाई कंपनिएं जात्रिएं गी सलाह दिती ऐ जे ओहू ब्हाई अड्डे लेई रवाना होने शा पैह्ले अपनी डुआरी दे ताजा स्थिति दी जांच करी लैन। जात्रिएं गी इब्बी आखेआ गेआ ऐ जे ओहू अपनी जात्तरा सरबंधी योजनां बड़ा दिक्खी सुनियै गै तैयार करना।

<><><><><><>

## IMD-Weather

मौसम विभाग मुजब पंजाब, हरियाणा, चंडीगढ़, दिल्ली, उत्तर प्रदेश, हिमाचल प्रदेश ते बिहार ते बिहार दे किश हिस्सें च अगले 2 दिनें तगर घना कोहरा छाए दा रौह्ग। आकाशवाणी न्यूज कन्नै खास गल्लबात करदे होई मौसम विभाग दे वरिष्ठ वैज्ञानिक डॉ. आर.के जेनामणि होरें दस्सेआ जे इनें राज्यें च दृश्यता 0-50 मीटर बश्कार रौह्ने दी मेद ऐ।

<><><><><><>

## Weather

जम्मू दे पदरे इलाकें च अज्ज घनी धुंध करी आम जनजीवन पर माड़ा असर पेआ ऐ। तोआई, मौसम विभाग नै जम्मू-कश्मीर च कल्लै तगर अद्दे-दुब्बे तौरा पर बहल छाए दे रौह्ने दी पेशगोई कीती ऐ। 30 दिसम्बर गी किश थ्हारें पर हौली बरखा ते बर्फबारी होने दी मेद ऐ। 31 दिसम्बर ते पैहली जनवरी गी बी केई सारी थाहरें पर हौली बरखा ते खास करी उत्तरी ते मध्य कश्मीर दी उच्चिएं धारें पर बर्फबारी होने दे आसार ना। जम्मू खित्ते दे मैदानी इलाके च घनी थमां दरम्याने दर्जे दी धुंध पौने दी बी खबर ऐ।

<><><><><><>

## Chess

फिडे विश्व रैपिड प्रतियोगिता च अर्जुन एरिगैसी ते कोनेरू हम्पी नै कैऽ दा तगमा जित्तेआ ऐ। मैग्रस कार्लसन ते एलेक्सजेंड्रा नै खिताब अपने नाऽ कीता। प्रधानमंत्री नरेंद्र मोदी होरें फिडे विश्व रैपिड प्रतियोगिता च कैऽ दा तगमा जित्ते लेई अर्जुन एरिगैसी ते कोनेरू हम्पी गी मुबारकबाद दिती।

<><><><><><>

## Roll Ball C'ship

17मीं जूनियर रोल बॉल राष्ट्रीय चैम्पियनशिप अज्ज थमां जम्मू दे एम.ए. स्टेडियम च शुरू होई गई ऐ। जम्मू-कश्मीर उपमुख्यमंत्री सुरिंद्र चौधरी होरें औपचारिक तौरा पर एहदा उद्घाटन कीता। एह प्रतियोगिता पहली जनवरी 2026 तगर चलोगा। एहदे च 26 राज्यें ते केन्द्र शासित प्रदेशें दे तकरबीन 600 खडारी ते अधिकारी हिस्सा लै'रदे ना। राष्ट्रीय स्तर दे इस आयोजन कन्नै नौजवानें च रोल बॉल गी बढ़ावा मिलग ते खित्ते च खेड्डू संस्कृति होर मजबूत बनग। आयोजकें दा आखना ऐ जे एहू चैम्पियनशिप बड्डे खेड्डू आयोजनें दे केन्द्र दे तौर पर जम्मू दी बधदी छवि गी दर्शादी ऐ।

<><><><><><>